

no. 25

LES
DESIRS
DE LA
FRANCE,
SVR LA MORT
DE CONCHINE.


853. G. 43



A PARIS;

De l'imprimerie de PIERRE DVRAND,
au mont S. Hilaire, à l'image S.
Sebastien, deuant le Puits-
Certain.

M, DC. XVII.





*Les desirs de la France, sur la mort
de Conchine.*

IRE,

S L'on ne void que signes
d'alegresse, qu'applaudisse-
ments, que benedictions sur
vostre personne, à bon droict ces bons
Brutes reuiennent, tout est remis en li-
berté, toute la France a fait feu de ioye,
la grande lieffe luy fait perdre le souuenir
des douleurs qu'elle auoit conceüe du-
rant ces cinq ou six ans tyrâniques, pour
luy fournir des loüanges & luy mettre en
main le laurier immortel, dont elle puis-
se couronner son R O Y : Et certes ce n'est
pas sans raison ; car si iamais peuple a eü
occasion de se resiouir, & de l'obligation
à son R O Y, la France sera celle qui aura
le premier lieu, puisque tout ce qui se

A ij

trouue dans tous les autres illustres per-
 sonnages que les admirables vertus ont
 voulu venger de l'ingrat oubly, se ren-
 contre comme receuilly dans son Prin-
 ce : La grandeur de courage de ce tant
 renommé comme premier de l'Vniuers
 Alexandre, vous cederà; car bien qu'en
 sa tendre ieunesse il aye rendu son peuple
 iouissant d'une paix incroyable, si est-ce
 pourtant qu'il n'a iamais entrepris en
 beaucoup d'annees, ce que vous auez ac-
 compli en vn moment: La fortune in-
 constante quitte son favori Pompee,
 pour vous estre constante: La valeur de
 Scylla, aussi bien que celle de Cesar, se
 recognoist d'elle mesme trop deffectueu-
 se à l'aspect du commencement de la vo-
 stre: Et aussi nous ne pouuons croire
 qu'un tel prodige peust arriuer dans la
 nature de voir dans la France, dans le
 Throne d'un GRAND HENRY, dont
 l'innuincible valeur parmy les orages de
 guerre, ny le conseil dans le calme de la
 paix, ne trouua iamais son pareil, un
 Prince denué des vertus que ce grand
 Monarque luy auoit laissé pour heritage,
 aussi bien que la Monarchie: SIRE, ne

vous oubliez pas pour toutes ces loüanges, & ne vous embrouillez point l'esprit de croire que cela vient de vous, car ça esté de Dieu, de la main duquel vous auez receu le foudre pour fouldroyer les rebelles, à la grandeur des Roys, trop contraires à l'humilité de son fils: Faiétes de vostre costé quelque chose, monstres encore (avec la puissance 'du mesme DIEU) l'effect de vostre bonté, & de la magnanimité de vostre courage, vostre peuple vous en prie: Chassez le reste de ceste tristesse du cœur de vostre peuple, qui luy enuoyoit vn glaçon dans le sein, vn passe effroy sur le visage, & vne viuue source de larmes dans les yeux: La cause de ceste pœur, de tant de bondes de larmes, & de muette colere, s'est faiét assez recognoistre à la mort de celuy, duquel la vie en estoit l'auteur: Et aussi ie ne m'en estonne pas, puisque (comme toute la France disoit) tout ainsi comme on doit porter le mal patiemment qu'on a merité par sa faute, de mesme c'est vn regret trop cuisant d'estre puni & n'auoir point failli, elle s'esmeruilloit comment tant de courtoisie n'auoient

rien produict dans ceste ame cazaniere
 que de l'ingratitude, comment il se mes-
 congnoissoit à la face de sa fortune chan-
 gee. Vrayemēt sans doute ça esté la diui-
 ne puissance qui a esté touchée des traits
 de la pitié : Et aussi comment ce pour-
 roit-il faire autrement ? il faudroit que
 DIEU n'eust eu d'oreille pour entendre
 tant de clameurs, qui partant du pro-
 fond d'un cœur zélé au service de son
 ROY, portoyent dans les cieux tant de
 plaintes ? quoy ! disoit la France, DIEU
 vengeur de l'infidelité & de l'iniustice,
 aussi bien que de l'orgueil, demeure tu
 oisif, sçachant l'iniure que reçoit le ROY,
 & ses fidels seruiteurs, & le sieur Desma-
 fures (car elle ne l'osoit nommer par son
 nom, sinon avec autant de respect que
 nous vous en deuons SIRE) ne sent point
 la iuste rigueur de ton foudre ? que ne
 commande tu à la terre de s'ouvrir pour
 l'engloutir, ou à la mer de le venir ensep-
 uelir dans ses ondes. Il n'est pas besoing
 de Rethorique pour persuader cela, la
 chose mesme le demonstre, les funeraill-
 les du marauld, ont esté le tesmoignage
 du feu de l'amour de son ROY, & de la

rigueur de son martire, elle ne pouuoit plus brusler de ce flambeau, elle ietroit trop de larme.

SIRE, ce peuple se sent infiniment obligé à vostre Majesté, mais pour tant, sil y a du pardelà à l'infini, il vous prie encore de l'obliger (pour l'entiere deliurance de vostre Estat) de nous redonner celuy-là qui a tousiours esté bruslé du desir de venger l'iniustice que l'on vous faisoit souffrir; celuy di-je qui a tousiours esté jaloux de la brèche que l'on se preparoit de faire à vostre puissance absolue, lors, SIRE, que vous nous l'aurez redonné, sil ne vouloit vouër ses biens, son seruice, & sa vie, pour l'accroissement de vostre grandeur: (mais il ne fera iamais autrement) la mort de ce Coyon luy seruira de gage pour l'asseurer combien la France a d'enuie & de jalousie à l'encontre de ceux qui ne rendent pas l'obeissance qu'ils doiuent à leur ROY.

SIRE, ie vous représente comme dans vn tableau le desir de tous vos fideles seruiteurs, apres auoir esté prié d'vne milliace, je suis seulement leur Truche-

ment, qui en leur nom (excusez, SIRE, si
 j'eusse de ces termes) vous prie de ceste
 faueur: Ils m'ont dict que vous les auiez
 tousiours tant estimez, que desia presque
 ils s'en auoyent promettre le fruit de
 leur demande, vous souhaittant la vie
 aussi longue qu'à vn aultre Nestor, &
 que laissant la les larmes, ils s'armoient
 des prieres qu'ils presentent au grand
 maistre des Monarchies, pour vous im-
 petrer vn aultre Royaume dans ces Pal-
 lais estoilleez, en recompense du seruice
 que vous aurez employé en celuy-cy à
 regir son peuple, & à garder ses com-
 mandemens.

F I N.

